



# SLUŽBENI GLASNIK OPĆINE ŽIVINICE

GODINA XLIX

23.APRIL 2014. GODINE

BROJ 6

Na osnovu 13. Zakona o principima lokalne samouprave u Federaciji BiH („Službene novine FBiH“ br. 49/06), člana 60. i 62. Zakona o plaćama i naknadama u organima vlasti Federacije Bosne i Hercegovine (“Sl. novine FBiH”, br.45/10 i 111/12) i člana 24. Statuta općine Živinice (“Službeni glasnik općine Živinice” broj:4/12), Općinsko vijeće Živinice, na sjednici održanoj dana 31.03.2014.godine, donosi

## O D L U K U

**o plaćama i naknadama uposlenika i izabranih dužnosnika u organima općine Živinice**

### I OSNOVNE ODREDBE

#### Član 1.

Ovom Odlukom se utvrđuje osnovna plaća, dodaci na plaću i naknade uposlenika i izabranih dužnosnika u organima općine Živinice

#### Član 2.

Uposlenicima u organima općine Živinice se smatraju izabrana i imenovana lica, kao i državni službenici i namještenici koji su u radnom odnosu u službama za upravu i stručnim službama općine Živinice.

Izabranim licem, u smislu ove odluke, smatra se izabrani dužnosnik - Općinski načelnik, kao nosilac izvršne funkcije.

Imenovanim licima se smatraju općinski Pravobranilac, zamjenik općinskog Pravobranioca i savjetnici Općinskog načelnika (u daljem tekstu imenovana lica).

Državnim službenicima se smatraju rukovodeći i ostali državni službenici koji obavljaju poslove osnovne djelatnosti iz nadležnosti općinskog organa državne službe.

Namještenicima se smatraju uposlenici koji obavljaju dopunske poslove osnovne djelatnosti i poslove pomoćne djelatnosti iz nadležnosti općinskog organa državne službe.

Izabranim dužnosnicima se smatraju vijećnici u Općinskom vijeću Živinice.

#### Član 3.

Finansijska sredstva za plaće i naknade i druga primanja uposlenika i izabranih dužnosnika u organima Općine Živinice predviđena ovom Odlukom, planiraju se i osiguravaju u Budžetu Općine Živinice.

#### Član 4.

Visinu osnovice za obračun plaće utvrdit će Općinski načelnik u dogovoru sa Sindikatom državnih službenika i namještenika, prije donošenja Budžeta općine Živinice za

narednu fisklanu godinu, s tim da osnovica ne može biti veća od osnovice utvrđene na nivou Federacije Bosne i Hercegovine.

Ukoliko se Općinski načelnik i Sindikat ne dogovore o visini osnovice, ranije dogovorena osnovica ostaje na snazi do dogovora Općinskog načelnika i Sindikata.

Osnovna plaća se utvrđuje množenjem osnovice za obračun plaće sa utvrđenim koeficijentom platnog razreda.

Iznos osnovne plaće, utvrđen na način iz prethodnog stava, uvećava se za 0,5% za svaku započetu godinu penzijskog staža uposlenika u organima Općine Živinice, a najviše do 20%. Osnovna plaća ne može biti manja od 70% prosječne neto plaće osplaćene u Federaciji BiH prema posljednjem objavljenom statističkom podatku

U slučaju da osnovna plaća iznosi manje od 70% prosječne plaće, uposleniku će se isplatiti plaća u navedenom procentu.

Osnovna plaća se obračunava i iskazuje mjesečno za puno radno vrijeme, prema radnom mjestu, i odgovarajućem platnom razredu. Ukoliko uposlenik radi s nepunim radnim vremenom, u skladu sa posebnim zakonom i drugim propisima, osnovna plaća odredit će se srazmjerno vremenu provedenom na radu.

Puno radno vrijeme uposlenih je 40 sati sedmično.

#### Član 5.

Za sve uposlenike iz člana 2. ove odluke, utvrđuju se platni razredi i pripadajući koeficijenti za obračun plaće.

## II PLAĆE I NAKNADE OPĆINSKOG NAČELNIKA I IMENOVANIH LICA

#### Član 6.

Izabrani dužnosnik - Općinski načelnik, kao nosilac izvršne funkcije, općinski Pravobranilac, zamjenik općinskog Pravobranioca i savjetnici Općinskog načelnika, koji dužnost obavljaju profesionalno, imaju pravo na plaću .

Općinski načelnik, pravo na plaću iz stava 1. ovog člana, ostvaruje danom potvrđivanja izbora od strane Centralne izborne komisije.

Općinski Pravobranilac, zamjenik općinskog Pravobranioca i savjetnik Općinskog načelnika, pravo na plaću iz stava 1. ovog člana ostvaruju danom postavljenja na radno mjesto.

#### Član 7.

Izabrana i imenovana lica iz člana 2. odluke razvrstavaju se u četiri platna razreda i za svaki platni razred se utvrđuju koeficijenti za obračun plaća u sljedećim vrijednostima:

Platni razred	Radno mjesto	koeficijent
I	Općinski načelnik	8,30
II	općinski Pravobranilac	5,00
III	zamjenik Pravobranioca	4,60

## Član 8.

**Naknada plaće zbog bolesti ili povrede**

Za prvih 42 dana odsutnosti s posla zbog bolesti ili povrede, izabrana i imenovana lica iz člana 2. ove odluke koja ostvaruju pravo na plaću imaju pravo na naknadu plaće u visini plaće koju je ostvario za prethodni mjesec.

Izabrana i imenovana lica iz člana 2. ove odluke imaju pravo na naknadu plaće u visini od 70% plaće koju je ostvario za prethodni mjesec prije odsutnosti s posla zbog bolesti ili povrede za odsutnost s posla duže od 42 dana a najduže 12. mjeseci odnosno do kraja mandata.

Izabrana i imenovana lica iz člana 2. ove odluke imaju naknadu plaće u punom iznosu koju su ostvarili za prethodni mjesec, ako je do odsustva s posla došlo iz razloga povrede na radu.

## Član 9.

**Naknada za ishranu tokom rada**

Izabrana i imenovana lica iz člana 2. imaju pravo na novčanu naknadu za ishranu u toku rada (topli obrok) u visini 1% prosječne mjesečne neto plaće isplaćene u Federaciji Bosne i Hercegovine po zadnjem objavljenom statističkom podatku.

## Član 10.

**Naknada za godišnji odmor – regres**

Izabrana i imenovana lica iz člana 2. imaju pravo na naknadu na ime regresa za korištenje godišnjeg odmora u visini 50% prosječne neto plaće isplaćene u Federaciji Bosne i Hercegovine po zadnjem objavljenom statističkom podatku i naknadu za plaćeni dopust u dužini od 30 dana u visini svoje neto plaće iz prethodnog mjeseca.

## Član 11.

**Naknada za slučaj smrti, teške bolesti i invalidnosti**

Naknadu za slučaj smrti, teške bolesti i invalidnosti izabrana i imenovana lica ostvaruju na način i pod uvjetima utvrđenim za državne službenike i namještenike u organima Općine Živinice.

## Član 12.

**Otpremnina**

Izabrana i imenovana lica imaju pravo na otpremninu prilikom odlaska u penziju u iznosu od pet njegovih prosječnih plaća isplaćenih u prethodnih pet mjeseci.

## Član 13.

**Naknada troškova za službena putovanja**

Izabrana i imenovana lica upućeni na službeno putovanje imaju pravo na naknadu troškova dnevnice, noćenja, prijevoza i ostalih izdataka nastalih u vezi sa službenim putovanjem.

**III PLAĆE, DODACI NA PLAĆU I NAKNADA PLAĆE DRŽAVNIH SLUŽBENIKA I NAMJEŠTENIKA**

## Član 14.

Državni službenik i namještenik ima pravo na plaću koja odgovara radnom mjestu na koje je postavljen.

Državni službenici razvrstavaju se u šest platnih razreda i za svaki platni razred se utvrđuju koeficijenti za obračun plaća u sljedećim vrijednostima:

Platni razred	Radno mjesto	Koeficijent
I	Sekretar OV	5,00
II	Šef službe, Šef stručne službe i Interni revizor	4,60
III	Inspektor	4,30
IV	Stručni savjetnik	4,10
V	Viši stručni saradnik	3,90
VI	Stručni saradnik	3,70

Namještenici u organu uprave općine Živinice razvrstavaju se u pet platnih razreda i za svaki platni razred se utvrđuju koeficijenti za obračun plaća u sljedećim vrijednostima:

Platni razred	Radno mjesto	Koeficijent
I	Viši samostalni referent (VŠS)	3,10
II	Samostalni referent (VŠS),	3,00
III	Viši referent (SSS) i VKV radnika	2,70
IV	Referent (SSS) i KV radnik III i IV stepena	2,60
V	Pomoćni radnik i nekvalificirani radnik (NK radnik)	1,85

## Član 15.

Pravo na plaću državni službenik i namještenik ostvaruje od dana stupanja na dužnost. Plaća se obračunava i isplaćuje za prethodni mjesec, a utvrđuje se rješenjem kojeg donosi Općinski načelnik.

## Član 16.

Plaća pripravnika visoke, više i srednje stručne spreme u organu državne službe utvrđuje se u iznosu, i to:

- za visoku školsku spremu u iznosu od 80% od početne osnovne plaće utvrđene za radno mjesto stručnog saradnika,
- za višu školsku spremu u iznosu od 80% od početne osnovne plaće utvrđene za radno mjesto samostalnog referenta
- za srednju školsku spremu u iznosu od 80% od početne osnovne plaće utvrđene za radno mjesto referenta

Početna osnovna plaća iz stava 1. ovog člana predstavlja samo iznos plaće bez dijela plaće po osnovu penzijskog staža.

## Član 17.

**Dodatak na plaću**

Državni službenik i namještenik ima pravo na dodatak na plaću, koji je utvrđen odredbama ove odluke.

Dodatak na plaću čini sastavni dio osnovne plaće.

Državni službenik i namještenik ima pravo na dodatak na plaću po osnovu posebnih uslova rada u iznosu:

- a) za inspektore od 20% od osnovne plaće,
- b) za vatrogasce u iznosu do 30% od osnovne plaće
- c) za ostale poslove koji se vrše pod posebnim uvjetima određenim posebnim zakonom dodatak na plaću se može odrediti od 10% do 20%

## Član 18.

Državni službenik i namještenik ima pravo na plaćeni dopust u dužini od 30 dana u visini svoje neto plaće iz prethodnog mjeseca.

## Član 19.

Državni službenik i namještenik ima pravo na naknadu na plaću po osnovu prekovremenog rada u radne dane u visini od 50% od osnovne plaće, srazmjerno trajanju prekovremenog rada .

Državni službenik i namještenik ima pravo na naknadu na plaću po osnovu prekovremenog rada u neradne dane (subotom i nedjeljom) u visini od 30% od osnovne plaće, srazmjerno trajanju prekovremenog rada. Pravo na ovu naknadu na plaću nema uposlenik na radnom mjestu koji se organizovano obavlja u smjenama.

Državni službenik i namještenik ima pravo na naknadu na plaću za rad noću u visini od 35% od osnovne plaće srazmjerno trajanju noćnog rada. Noćnim radom se smatra rad od 22:00 do 06:00 sati.

Državni službenik i namještenik ima pravo na naknadu na plaću po osnovu rada u dane državnog praznika koji su po zakonu neradni u visini od 50% od osnovne plaće, srazmjerno trajanju rada u dane državnog praznika.

Naknade na plaću iz ovog člana se obračunavaju na osnovnu plaću, bez dijela plaće po osnovu radnog staža i čini sastavni dio plaće.

Obzirom na izuzetno složenu ekonomsku situaciju i budžetski deficit, državni službenik i namještenik, u slučaju neophodne potrebe da radi duže od radnog vremena poslove koji su u opisu poslova njegovog radnog mjesta, to vrijeme će kompenzirati za redovno radno vrijeme srazmjerno trajanju prekovremenog rada, u dogovoru sa neposrednim rukovodiocem, o čemu će poslodavac i sindikat potpisati sporazum.

## Član 20.

Državni službenik i namještenik ima pravo na sljedeće naknade :

**Naknada za ishranu tokom rada**

Državni službenik i namještenik ima pravo na novčanu naknadu za ishranu u toku rada (topli obrok) u visini 1% prosječne mjesečne neto plaće isplaćene u Federaciji Bosne i Hercegovine po zadnjem objavljenom statističkom podatku.

### **Naknada za godišnji odmor – regres**

Državni službenik i namještenik ima pravo na naknadu na ime regresa za korištenje godišnjeg odmora u visini 50% prosječne neto plaće isplaćene u Federaciji Bosne i Hercegovine po zadnjem objavljenom statističkom podatku.

Pravo na regres iz stava 1. ovog člana ima svaki državni službenik i namještenik koji u toku kalendarske godine ima pravo na godišnji odmor .

### **Naknada za bolovanje**

Državni službenik i namještenik ima pravo na naknadu plaće za vrijeme privremene spriječenosti za rad (bolovanja) do 42 kalendarska dana u visini njegove neto plaće isplaćene za prethodni mjesec.

Naknada za bolovanje preko 42 dana iz stava 1. ovog člana ostvaruje se po kantonalnom propisu kojim se uređuje naknada za ova oblast, s tim da se razlika do pune plaće isplaćuje iz Budžeta Općine.

### **Naknada za porodiljski dopust**

Državni službenik i namještenik za vrijeme porodiljskog dopusta ima pravo na naknadu plaće prema propisima kantona kojim se uređuje ova oblast prema mjestu uplate doprinosa s tim da se razlika do pune plaće isplaćuje iz Budžeta Općine.

### **Naknada za službeno putovanje**

Državni službenik i namještenik ima pravo na naknadu za troškove službenog putovanja na području Federacije, odnosno Bosne i Hercegovine, kao i za putovanja u inostranstvo, na koje se upućuju na izvršenje službenog zadatka, u skladu sa važećim propisima Vlade FBiH.

### **Naknada za troškove prijevoza na posao i sa posla**

Državni službenik i namještenik kojem nije organizovan prevoz na posao i sa posla, a čije je mjesto stanovanja udaljeno od mjesta rada najmanje dva kilometra, pripada naknada za troškove prijevoza u visini mjesečne karte gradskog, prigradskog ili međugradskog saobraćaja.

U međugradski promet spadaju mjesta koja su udaljena od mjesta rada do 70 km. Kao dokaz stvarnih troškova za prevoz sa posla i na posao, svaki državni službenik i namještenik dostaviće prijavu iz CIPS-a, sa adresom mjesta stalnog prebivališta.

### **Naknada za slučaj povrede na radu, teške bolesti i invalidnosti**

U slučaju povrede na radu, teške bolesti i invalidnosti državnog službenika ili namještenika ili člana njegove uže porodice, isplaćuje se jednokratna novčana pomoć, u visini od dvije prosječne mjesečne neto plaće u Federaciji Bosne i Hercegovine prema posljednjem statističkom podatku.

### **Naknada za slučaj smrti i pravo na osiguranje od posljedica nesretnog slučaja**

U slučaju smrti državnog službenika ili namještenika njegovoj porodici se isplaćuje naknada na ime troškova sahrane/ukopa u visini od četiri prosječne mjesečne neto plaće isplaćene u Federaciji Bosne i Hercegovine prema posljednjem statističkom podatku.

Članom uže porodice državnog službenika ili namještenika se smatraju: bračni ili vanbračni drug, dijete (bračno, vanbračno, usvojeno, pastorče i dijete bez roditelja uzeto na izdržavanje do 18 godina, odnosno do 26 godina starosti ako se nalazi na redovnom školovanju i nisu u radnom odnosu, a djeca nesposobna za rad bez obzira na starosnu dob), roditelji (otac, majka, očuh, maćeha i usvojitelj) pod uslovom da žive u zajedničkom domaćinstvu sa državnim službenikom i namještenikom, braća i sestre bez roditelja do 18 godina, odnosno do 26 godina starosti, ako se nalaze na redovnom školovanju i nemaju drugih prihoda već ih korisnik

naknade stvarno izdržava ili je obaveza njihovog izdržavanja zakonom utvrđena a ako su nesposobni za rad, bez obzira na starosnu dob pod uslovom da s njima žive u zajedničkom domaćinstvu i unučad ako nemaju roditelja i žive u zajedničkom domaćinstvu s državnim službenikom i namještenikom.

Naknada iz stava 1. ovog člana isplaćuje se i u slučaju smrti člana uže porodice državnog službenika i namještenika.

Državni službenik i namještenik ima pravo na osiguranje od posljedica nesretnog slučaja sa uključenim rizikom od prirodne smrti za vrijeme trajanja radnog odnosa u organu državne službe. Ugovor sa odgovarajućom osiguravajućom kućom zaključuje rukovodilac organa uprave.

### **Otpremnina**

Državni službenik i namještenik ima pravo na otpremninu pri odlasku u penziju u visini svojih pet ostvarenih prosječnih neto plaća isplaćenih u prethodnih pet mjeseci.

### **Naknada u slučaju prekobrojnosti**

U slučaju prestanka radnog odnosa državnog službenika i namještenika zbog prekobrojnosti, taj državni službenik i namještenik ima pravo naknade u iznosu:

- 1) za radni staž do 10 godina naknada iznosi tri neto plaće državnog službenika i namještenika
- 2) za radni staž od 11 do 30 godina naknada iznosi šest neto plaća državnog službenika i namještenika
- 3) za radni staž preko 30 godina naknada iznosi deset neto plaća državnog službenika i namještenika.

### **Naknada za rad u komisijama**

Članovi komisija koje se formiraju na osnovu rješenja Općinskog načelnika, a čije osnivanje je propisano zakonom, imaju pravo na maksimalnu naknadu za rad u komisiji po sjednici u iznosu od 30 KM, samo u slučaju da komisija radi van radnog vremena.

## **IV PRELAZNE I ZAVŠNE ODREDBE**

### **Član 21.**

Za sva pitanja iz oblasti plaća i naknada koja nisu regulisana ovom Odlukom, neposredno će se primjenjivati odredbe Zakona o platama i naknadama u organima vlasti u Federaciji BiH i Kolektivnog ugovora za državne službenike i namještenike u organima uprave i sudske vlasti FBiH.

### **Član 22.**

Općinski načelnik će donijeti Pravilnik o plaćama, dodacima na plaću i naknadama, u skladu sa odredbama Zakona o plaćama i naknadama u organima vlasti Federacije BiH („Službene novine FBiH“ br.45/10 i 111/12), drugim važećim podzakonskim propisima i odredbama ove Odluke, kojim će se bliže propisati pravo na naknade i postupak ostvarivanja prava na naknade utvrđene ovom Odlukom, u roku od 30 dana od dana stupanja na snagu ove Odluke.

Član 23.

Stupanjem na snagu ove Odluke prestaje da važi Odluka o plaćama i naknadama uposlenika i izabраниh dužnosnika u organima općine Živinice broj:10-05-2618/13 od 15.05.2013.godine („Službeni glasnik općine Živinice“ broj:7/13) i Odluka o izmjeni i dopuni Odluke o plaćama i naknadama uposlenika i izabраниh dužnosnika u organima općine Živinice broj:10-05-3670/13 od 22.07.2013.godine („Službeni glasnik općine Živinice“ broj:11/13).

Član 24.

Ova Odluka stupa na snagu danom objavljivanja u „Službenom glasniku“ općine Živinice.

Predsjedavajuća OV Živinice  
Samra Omić,s.r.

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
OPĆINA ŽIVINICE  
Općinsko vijeće  
Broj:10-05-1753/14  
Dana, 31.03 .2014.god.

Bosna i Hercegovina  
Federacija Bosne i Hercegovine  
Tuzlanski kanton  
Općina Živinice  
Općinski načelnik  
Broj:01/2-05-89-331/14  
Živinice, 21.04.2014. godine

Na osnovu člana 18. stav 3. Zakona o principima lokalne samouprave („Službene novine FBiH“, broj 49/06), člana 38. stav 1. tačka 6. i člana 114. Statuta Općine Živinice („Službeni glasnik Općine Živinice“, broj 4/12), Općinski načelnik dana 21.04.2014. godine d o n o s i

**ODLUKU**  
**o proglašenju Budžeta Općine Živinice za 2014. godinu**

**Član I.**

Ovom Odlukom proglašava se Budžet Općine Živinice za 2014. godinu.

Uz budžet iz stava 1. ovog člana, donijeće se i Odluka o izvršenju budžeta u skladu sa članom 7. stav 2. Zakona u budžetima Federacije BiH („Službene novine FBiH“, broj 102/13, 9/14, 13/14).

Uz budžet iz stava 1. ovog člana, u skladu sa članom 33. stav 3. Zakona u budžetima Federacije BiH prilaže se i revidirano mišljenje Ministarstva finansija TK na prijedlog budžeta Općine Živinice za 2014. godinu, broj 07/1-14-9141-1/14 od 21.04.2014. godine.

**Član II.**

Odluka stupa na snagu danom objavljivanja u Službenom glasniku Općine Živinice, a primjenjivaće se za fiskalnu 2014. godinu.

**Obrazloženje:**

U postupku pripreme i usvajanja Budžeta Općine Živinice za 2014. godinu, Općinski načelnik je kao ovlašteni zakonski predlagač, dostavio Općinskom vijeću Živinice Nacrt budžeta Općine Živinice i Nacrt odluke o izvršenju budžeta Općine Živinice za 2014. godinu. Općinsko vijeće, na sjednici održanoj dana 27.12.2014. godine, nije usvojilo Nacrt budžeta Općine Živinice za 2014. godinu, pa je shodno zakonskim propisima na istoj sjednici, donijelo Odluku o privremenom finansiranju budžeta Općine Živinice za period od 01.01.2014. do 31.03.2014. godine.

Na temelju provedenog akcionog plana Javnih rasprava o Nacrtu budžeta Općine Živinice za 2014. godinu sa građanima, javnim ustanovama i javnim preduzećima, mjesnim zajednicama i nevladinim sektorom, ovaj dokument je ponuđen na usvajanje Općinskom vijeću Živinice.

Na sjednici Općinskog vijeća održanoj 23.01.2014. godine, usvojeni su Nacrt budžeta Općine Živinice za 2014. godinu i Nacrt odluke o izvršenju budžeta Općine Živinice za 2014. godinu.

U vezi s tim provedene su opsežne aktivnosti na harmonizaciji mnogobrojnih zahtjeva ciljnih grupa sa javnih rasprava i zahtjeva klubova političkih stranaka u Općinskom vijeću Živinice. Posebnu težinu pripremi prijedloga budžeta za Općinsko vijeće dali su događaji iz februara ove godine, kada se opravdano nezadovoljstvo građana zloupotrijebilo i preraslo u devastaciju i uništenje državne imovine. U proces izrade prijedloga budžeta tada su mimo plana uključeni predstavnici plenuma, boračke populacije, poljoprivrednika, radnika „Konjuha“, pijačnih prodavaca i drugih neformalnih grupa, što je doprinijelo poremećaju planirane dinamike u postupku usvajanja Općinskog budžeta za 2014. godinu.

Nakon održanih mnogobrojnih sastanaka i konsultacija sa pomenutim neformalnim grupama i kolegijem Općinskog vijeća, te nekoliko vanrednih sjednica Općinskog vijeća, na kojima su Općinski načelnik i Općinsko vijeće donijeli niz odluka, zaključaka i drugih akata, kojima su usvojeni mnogi opravdani zahtjevi građana, determinisani su parametri za izradu prijedloga budžeta (smanjene su plaće uposlenika, paušali vijećnika, troškovi radnih tijela, ukinut tzv. „bijeli hljeb“, a povećana su izdvajanja za boračku populaciju, poticaji poljoprivredi, nevladinom sektoru, itd.). Tek nakon toga, Općinski načelnik i Služba za budžet i finansije napravili su konačnu verziju prijedloga budžeta Općine Živinice za 2014. godinu, te su ga dostavili Općinskom vijeću.

Općinsko vijeće razmatralo je prijedlog budžeta Općine Živinice na svojoj sjednici održanoj dana 31.03.2014. godine, a koja je prekinuta tek u ranim jutarnjim satima 01.04.2014. godine. Na nastavku sjednice Općinskog vijeća održanom dana 03.04.2014. godine, koja je nakon viščasovne rasprave ponovo prekinuta u ranim jutarnjim satima 04.04.2014. godine, Općinsko vijeće ni tada nije usvojilo budžet.

Na trećem nastavku pomenute sjednice održanom tek 21.04.2014. godine, nakon što vijeće ponovo nije pokazalo dobro volju i partnerstvo za usvajanje Općinskog budžeta, Općina Živinice je ostala blokirana u izvršavanju svojih finansijskih obaveza i realizaciji razvojnih projekata i programa.

Imajući u vidu kognitivnost odredbe iz člana 18. stav 3. Zakona o principima lokalne samuprave u FBiH, a u cilju obezbjeđenja normalnog funkcionisanja jedinstvenog organa uprave i općine kao javnog servisa građana Općine Živinice, Općinski načelnik odlučio je kao u dispozitivu ove Odluke.

Općinski načelnik

mr.sci. Hasan Muratović, s.r.

**„Službeni glasnik Općine Živinice“  
broj: 6/2014**

**SADRŽAJ**

**I - AKTI OPĆINSKOG VIJEĆA ŽIVINICE**

1. Odluka o plaćama i naknadama uposlenika i izabраниh dužnosnika u organima općine Živinice.....1

**II- AKTI OPĆINSKOG NAČELNIKA**

2. Odluka proglašenju Budžeta općine Živinice za 2014. godinu.....9

---

«Službeni glasnik Općine Živinice» uređuje: Stručna Služba općinskog vijeća Živinice  
Odgovorni urednik i lektor: Suad Avdagić, Nermina Mahmutbegović i Mersiha Zahirović  
Tehnička priprema i štampa: Služba za opću upravu i društvene djelatnosti  
Kontakt informacije: 035/743-394, ovijece@opcinazivinice.org

---